

Mahestat

Lo mi meditá den e **Splendor Glorioso** di **Bo Mahestat**, i lo mi testiguá di bo **Milagernan**, pa mundu tende di **Bo Obranan Potente** i di e **Splendor** i e **Mahestat Glorioso** di **Bo Reino** (**Salmo 145:5 & 12**).

Kristu Hesus a trese **Libertat** pa ami por tin un **Relashon Nobo** ku **Su Mahestat, SEÑOR Dios. Su Mahestat, SEÑOR Dios** a duna Moisés e **Lei**, ku ta enserá e **Mandamentunan**, e **Preseptonan**, e **Statutonan**, e **Ordenansanan**. Tur esaki nan tabata parti di e **Lei skirbi (Torah)**. **Su Mahestat, SEÑOR Dios** a duna Moisés tambe e **Lei papia** ku tabata enserá **Su Testimonionan; Su Huisio, Su Hustisia, Su Fieldat, Su Grasia, Su Bondat**. Tur esaki nan huntu ta forma parti di e **Enseñansa** ku **Kristu Hesus** ta papia di dje (**Mateo 5:17**).

Ún otro palabra pa e **Lei** i e **Profetanan** di den **Mateo 5:17**, ta e **Enseñansa**. E **Enseñansa** ku **Esun Ungi** a bin pa kumpli kune. **Kristu Hesus** ta e **Palabra** ku a bira karni anto a biba mei mei di nos anto hasta nos por a mira **Su Gloria, Gloria** manera e **Úniko Yu** di **Dios Tata** yen di **Grasia i Bèrdat** (**Juan 1:14**).

Kristu Hesus a bisa si satanas ta kontra di satanas anto e reino di satanas no por sobreviví pero lo **frakasá i kaba na nada** (**Mateo 12:26**). Si **Kristu Hesus** ta e **Palabra**, anto e **Palabra** ta e **Enseñansa**, ta kon nos por kere ku **Esun Ungi** a bin **kaba i kibra** ku e **Lei (Torah)**, ku ta parti di **Su Reino** i ku ta e **Palabra?** (**Mateo 5:17**).

Kristu Hesus a bisa: "Ku rason Isaias a profetisá di boso, hipókritanan, manera ta pará skirbí: 'E pueblo aki ta **Honra Mi** ku nan lepnan, ma nan **Kurason** ta leu for di **Mi**. Ma en bano, sin niun nifikashon, sin niun balor, nan ta pretendé di ta **Adorá Mi**, siñando komo doktrina e preseptonan di hende i neglighando e **Mandamentu** di **Dios**, boso ta tene boso mes na e tradishon di hende dunando boso tradishon e mes-un peso ku e **Lei**.'" (**Marko 7:6-8**)

Sabi ku e **Lei** di **Su Mahestat, SEÑOR Dios**, no por wòrdu pone aserka òf kita afó, pasobra den **Su Splendor** i **Gloria** niun hende no por tribi di para. Ta pa esaki **Kristu, Esun Ungi** a bisa: "te ora ku shelu i tera pasa, ningun yota ni tilde di e **Lei** lo no pasa, te ora ku tur kos keda kumplí" (**Mateo 5:18**).

Aki nan **Hesus** ta mustrando ku e **Lei di Su Mahestat, Dios Tata** ta e úniko **Lei** ku hende mester sigui, anto e **Lei di Dios Tata** ta skirbi den e promé 5 bukinan di Beibel. Tur sobra lei ku bini mester ta bai bou di lei di **Su Mahestat, Dios Tata**. Es desir nos no por bai traha leinan ku ta bai kontra di **Su Mahestat, Dios Tata**, pasobra e ora ey nos ta praktikando **rebeldia** i **desobediensia**. Pasobra **rebeldia** ta manera e **piká di bruheria**, i **desobediensia** ta manera **inikidat i idolatria**, Pasobra bo a rechasá e palabra di **SEÑOR**, E tambe a rechasá abo komo **rei**." (**1 Samuel 15:23**).

Ta pa esaki **Su Mahestat, SEÑOR Dios**, a manda **Rei di Reinan** pa abo **rei** no keda rechasá, dor di **desobediencia**, ma dor di abo su **Obediensiá** tin e **Libertat** ku e **Rei di Reinan** a bin trese pa abo **rei** i pa abo warda e **Mandamentu** sin mancha ni reproche, te na e aparishon di nos **Señor, Esun Ungi**, kual **Su Mahestat, SEÑOR Dios** lo manifestá na su debido tempu **Esun Ungi**, Kende ta e **Bendishoná** i e úniko **Soberano**, e **Rei di reinan**, i **Señor di señornan** (**1 Timoteo 6:14-15**).

25 ougùstùs 2017

Sea Bendishoná den e Amor di Yeshua Mesias

Rev. Remsly L Riley